

江蘇省立蘇州圖書館
吳中文獻小叢書之十

石隱山人自訂年譜





刊行吳中文獻小叢書旨趣

地方文獻，全文化之所由積也。文化爲物，羣倫攸共，故凡尊惜文化，應自地方文獻始。吾吳夙稱東南文藪，文獻箸錄，與禩俱進；或旣鉛槧，或祕篋衍。經茲兵燹，散佚難稽；歷劫幸存，彌足珍貴。本館整拾叢殘，職責莫貸；爰擬就有關地方文獻之亟待表章者，如先儒專著，寓賢瓊紀，或其遺稿未經刊布，或雖刊刻而流傳已尠，特輯爲吳中文獻小叢書，次第梓行。孔氏有言：「文獻不足故也，足則吾能徵之矣！」謹以俟諸來者之徵。體制苟簡，尙鑒微志。

朱豐芑先生駿聲以研究說文、著說文通訓定聲一書、著稱於清代學術界、說文之研究、清以前注意者甚少、唐宋間有徐鉉、徐鍇、李燾、吾邱衍輩、稍有著述、然多襲前人所言、說文之成爲專門學術而佔學術上之重要位置、則始自清乾嘉以後、而有專書研究者、則自我吳惠棟始、尤以段玉裁之說文解字注爲最有名、自後研究者、闡明益精、以音韻爲主而研究說文者、則有姚文田說文聲系、錢塘說文聲系、苗夔說文聲讀表、嚴可均說文聲類、張惠言說文諧聲譜、朱駿聲說文通訓定聲等書、朱氏書成最晚、而價值最高、其書舍形取聲、貫穿聯綴、將說文九千餘文類、重爲組合、分隸各字於古韻十八部之下、羅惇衍說文通訓定聲序、謂朱氏之書、一蒼萃衆說、而得其精、且舉轉注之法、獨創義例、根據鑿實、發前人所未發、一生平之研究心得、可謂盡於此書、先生名駿聲、字豐芑、號允倩、別署石隱山人、吳縣人、年十三、卽通曉說文解字、十五冠郡試、補府學生、錢大昕主紫陽書院講席、奇其才、遂受業門下、嘉慶二十三年舉鄉試、選授黟縣訓導、道光末、詔海內文學之士、獻所著書、先生呈所自撰說文通訓定聲、優詔褒嘉、賞國子監博士銜、旋升揚州府學教授、引疾未之官、僑居黟縣石村、卒年七十一、生平著述甚富、多至九十餘種、惜皆爲成稿、說文通訓定聲外、均未見刻本、先生於學無所不窺、尤精算術、七百八十三座之星、能指

~~236035~~

石隱山人自訂年譜引言

二

而明之、有歲星表、天算瑣記、數度衍等書、此自訂年譜、絕筆於咸豐三年、後五年事、係門人程朝儀補輯、並附先生之孫師轍補注、堪稱詳備、爲特錄校付梓、以廣流傳、民國廿八年十二月、江蘇省立蘇州圖書館編纂委員會識、

石隱山人自訂年譜

朱駿聲遺著
孫師轍補注

山人姓朱氏

乾隆五十三年戊申二月二十三日丙辰未時生於蘇州府城調豐里名駿聲字豐苞號允倩小名慶元曾祖鏘妣張氏沈氏祖煥妣沈氏俱歿繼祖妣金氏父德垣是年三十有五妣張氏生妣陳氏五十四年巳酉二歲二月二十三日週歲明日嫡母張太孺人慶四十是年世父德基游幕廣東五十五年庚戌三歲識字數百

五十六年辛亥四歲解四聲張太孺人授以唐律能頃刻背誦數十首

五十七年壬子五歲讀四子書仍秉慈訓

五十八年癸丑六歲

五十九年甲寅七歲承庭訓始誦五經

六十年乙卯八歲受經於世兄顧蘭皋(名學富)時蘭皋師受業於先府君館於吾家三載夜則府君自

課五月十八日金太安人七十壽

嘉慶元年丙辰九歲十三經以次讀竣兼讀古文秋學爲時文自開筆以至鄉薦皆先府君親自督課無

石隱山人自訂年譜

二

間、

二年、丁巳、十歲、七月二十一日寅時、大母金太安人壽終、距生於雍正四年五月十八日酉時、年七十有二、冬、應縣府童子試、

三年、戊午、十一歲、七月、聘徐孺人、宛平舉人湖南安鄉知縣東屏世伯（諱元展）之女、東屏公大父授業弟子也、

四年、己未、十二歲、縣府試皆終場、

五年、庚申、十三歲、院試、六月十三日、平江書院甄別、郡尊任曉村夫子（諱兆炯）拔取內課第四名、時山長吳竹堂年祖（諱齋）極垂青睞、每試輒列高等、同學院者有謝炳奎、蔣廷榮、譚瑞東、張紫琳、褚逢椿、陸仁熊、周肇羲、彭希鍾、李虎臣、郝掄才、尤崧鎮、夏濂、倪東旭、張雲翀、嚴昂青、胡國英、沈齡度、張齡、王普階、徐昂、陶文植、薛濂、吳謙、李師杰、王會圖、邵鶴申、南金、朱鶴書、顧道鼎、諸人、（師轍按 家君小桃源筆記云先博士十三歲作孔方傳）

六年、辛酉、十四歲、十一月初一日、縣試第四名、十二月初七日、府試第一名、元和舒石溪夫子（諱懷）郡守任曉村夫子（諱兆炯）是年仍庭訓、間命問業於徵士任心齋姨丈（兆麟）進士莊樸園世丈（學和）十一月、祖妣金太安人合葬於陽山祖塋、十二月、湯姑母歿於淮安、

七年壬戌十五歲、二月十九日、院試入府學、履歷十三歲、學使平寬夫夫子（諱恕）五月、入紫陽書院附課肄業、時宮詹錢竹河夫子主講席、宮詹亦十五歲入泮、是年重游泮宮、初謁時、有傳授衣鉢之語、極蒙獎借、以國士目之、並許受業、十月、書院升外課、是年、隨侍卜三英世伯宅讀書、

八年癸亥、十六歲肄業紫陽書院、升補內課、間問業於張大令午園（諱炳南）夫子、張、山東人、是年大水、市米翔貴、

九年甲子十七歲、在家教授生徒、自是至甲戌年、共十一載、學徒有茂才王安瀾、吳近仁、朱光照等、秋鄉試薦卷、出李（諱德滄）夫子房、中丞汪稼門夫子（諱志伊）以諸生墨卷甄別書院、仍取內課、是夏中丞在書院決科、三文一詩、憶與先君子及徐少鶴世長一室、構思達旦、三人同出、十月二十九日、申時、丁生母程太孺人憂、距生於戊辰八月初七日未時、壽五十有七、是夏大雨水災、米昂貴、

十年乙丑十八歲、正月二十二日、扶程太孺人柩權厝於府學西放生庵竹園內、授徒於家、仍肄業紫陽書院、給諫馮實庵夫子（諱培）主講席、是月、公餞大司寇妻杜孺入都、十月、侍府君往浙江天竺寺、是年、制軍鐵梅庵（保）奏建正誼書院於滄浪亭、

十一年丙寅十九歲、二月、調入正誼書院肄業、中丞汪稼門夫子開課紫陽、以府君同在一院、適有孝廉譚雲亭茂才、譚芝田喬梓同肄業正誼、因與雲亭丈對調、時正誼山長編修汪艾塘夫子（諱庚）汪、安

徽全椒人、十二月服除、授室徐氏、先是允聘後、外舅歿於京師、徐孺人姨夫李味莊、(諱廷敬)任松東兵備道、撫爲寄女、是年自上海來歸、

十二年丁卯、二十歲、秋鄉試不售、恭送楮筠心太世伯入祀鄉賢、十月、長女瑞芝生、十二月初九日辰時、丁母張太孺人憂、距生於庚午二月二十四日寅時、壽五十有八、

十三年戊辰、二十一歲、八月、開恩榜、未與試、十一月初四日、妣張太孺人生妣程太孺人合葬于陽山新阡、是年四月、庶母張氏來歸、

十四年己巳、二十二歲、正誼山長爲給諫吳江費鶴江夫子、(諱振勳)先府君仿聚珍版刊活字數、萬印、宋吳曾能改齋漫錄二百部、命予襄校、

十五年庚午、二十三歲、服除、鄉試、薦卷出沈(諱)邦基夫子房、(師轍按庚午女史百詠是年所作)

十六年辛未、二十四歲、二月、學使劉洵芳夫子(鑲之)歲試、取一等第六名、食餼、旋舉優行、自補弟子員、後十年中、五遇歲科、俱未試、一疾病、四守制、至是始受知於劉師、

十七年壬申、二十五歲、納妾錢氏、是年正誼山長爲農部吳燮堂世伯、(諱頤)

十八年癸酉、二十六歲、鄉試不售、冬病傷寒、幾殆、徐炳南、周彩東、林蘭坡、諸醫活之、舊患偏頭風十餘年、至是右目傷短視、而夙疴亦瘳、是年郡學建尹文端、陳文恭、二公合祠、隨方伯慶蕉園夫子(保)恭送

入祀、

十九年甲戌、二十七歲、四月、大妹生是年、因旱大飢、官賑易米以錢自此始、貧民稱便、

二十年乙亥、二十八歲、七月、遷居盤門內梅家橋安安街、

二十一年丙子、二十九歲、正月、館馬大籙街汪氏、學徒上舍汪德增、八月、鄉試金陵、大病半月、

二十二年丁丑、三十歲、仍館汪氏、遷居閶門外北濠四擺渡口、

二十三年戊寅、三十一歲、鄉試、九月十四日、報捷、中式第十名、履歷二十九歲、大主考少司寇帥仙舟夫

子、(承瀛)副主考侍御盧秋槎夫子、(炳濤)房考安徽來安令楊景山夫子、(沂)監臨中丞陳薊谷夫

子、(桂生)監試司馬羅麓西夫子、(琦)十月、往江陰謁學使少宗伯湯敦甫先生、(金釗)填親供、又往

揚州考入孝廉堂肄業、時直指厚庵先生、(阿克當阿)山長爲同鄉顧南雅侍講、(竊)

二十四年己卯、三十二歲、正月、入都會試、出侍御陳偉堂夫子、(官俊)房、留京與金研香同館內城、予在

東四牌樓十條胡同福宅、學徒有色克精阿、正白旗人、秋患痢月餘、服顧耕石方愈、從耕石處借得昭

陵碑一函、是年、恭遇仁宗睿皇帝六旬萬壽、九月二十五日、敬往倚虹堂、明日接駕、隨蹕至隆宗門、進

呈萬壽詩冊、十月初六日黎明、午門祝釐、拜跪如禮、會有河工漫口事、上意不忿、獻冊諸臣、俱未邀恩

召試、

二十五年、庚辰、三十三歲、留京、會試出司業周穉圭（名之琦）房、五月、自都中旋里、仍館汪氏、學徒有茂才管蘭滋、浙江湖州籍、上舍許邦治、直隸通州籍、茂才邢大鈞、江陰籍、是年、七月二十五日、仁宗睿皇帝龍馭上賓、

道光元年、辛巳、三十四歲、仍館汪氏、十月、帥師薦掌浙江嵎縣嵎山書院教、

二年、壬午、三十五歲、正月、入都會試、五月、次妹生、予留京、仍館福氏、兼爲張敬躬侍郎（誠安）書記、時同鄉舊雨及都人士詩酒過從者、徐少鶴（頌）、陳師竹（煥）、張白也（應雲）、吳有庚（毓金）、胡石夫（希周）、彭詠莪（蘊章）、顧耕石（元熙）、張子畏（寅）、徐燮堂（口口）、何絜人（覲揚）、明古漁（誼）、明鼎雲（訓）、鄂雲浦（順安）、王若山（綬）、劉玉坡（韻珂）、諸君、五月、往蘆溝橋劉家峪掃外舅墓、八月二十七日、附方伯王賜山（輅）舟至天津、謁都轉葉筠潭（紹本）、九月、回京、是年、揀選以知縣用、嵎縣令葉桐封請主剡山書院講席、

三年、癸未、三十六歲、留京會試、出同年徐士芬編修房、四月、因事往馬蘭峪瞻仰萬壽吉地、旋回京、五月二十八日、考教習、一文一詩、六月十三日、考國子監學正、一文一策、俱未獲選、八月、自京水程歸、十月抵里、十一月、長女許字葑門內十全街王仁誥、

四年、甲申、三十七歲、家食、十一月、往浙江帥師處祝壽、留三日、隨往嵎縣剡山書院、時新任嵎令宮樹德、

是年纂修郡志咨部列名貢舉（轍按夏小正補傳後附有道光四年星候表書當成于是年）

五年乙酉三十八歲二月張蘭渚中丞聘掌書記兼佐摺奏四月大妹許字婁門外顧榮熙長子元墉六月中丞調任安徽因親老辭不往七月署吳江令劉別駕（文澈）聘入幕兼掌教松林書院是年四月又應青浦令蔡維新主講青溪書院之聘十月初十日皇太后五旬萬壽

六年丙戌三十九歲會試不第三月二十八日在內閣大挑二等王大臣爲惇親王托津汪公廷珍松筠公奕經公昇寅公韓公鼎普七人出都往杭州候署臬（鄂順安公）卽旋里

七年丁亥四十歲三月就館揚州謝司寇第弟子附生謝增其曾祖未堂先生爲先大父同年十二月旋里是年吾蘇陶雲汀中丞梁芷鄰方伯陳芝楣太守重修滄浪亭又建五百名賢祠

八年戊子四十一歲仍館揚州著六十四卦經解十二月旋里（轍按唐李賀小傳稿旁注戊子七月亦此年所作）

九年己丑四十二歲正月大病月餘三月中旬仍往揚州六月文匯閣抖晾書籍往讀未見書又瞻仰史忠正公遺像幘子及殉節時家書墨蹟九月游梅花嶺仰止閣部墓是年吾蘇陶中丞於楓橋鐵鈴關重建文星閣又五百名賢祠告成

十年庚寅四十三歲仍館揚州九月二十七日巳時悼亡室徐孺人生於乾隆己酉十二月初四日亥時

卒年四十有二、在邗聞耗、十月初、蒼黃歸家、大病幾殆、兩月始瘳、十二月、葬徐孺人於陽山新塋、昭位之左、

十一年辛卯、四十四歲、正月初八日子時、丁府君憂、府君壽七十有八、四月、京報選授安徽旌德縣訓導、守制、十月、應嘉定令姚壺峯（大成）筆墨之聘、初五日到嚮、

十二年壬辰、四十五歲、正月、往嘉定、二月、旋里、接到揚州崔筱瀾新關書、延課子姪、三月、往揚州、十二月、旋里、（師轍按孔孟紀年後論末云道光十有一年冬月因論聖賢出處書此以授崔子聯保聯保

當是筱瀾子姪輩）

十三年癸巳、四十六歲、四月、服闋、嫁女於王仁誥、七月、至山東省城、應金鄉令崔（駿）之聘、九月、家中大妹出閣、（師轍按書經古注便讀成於此年、民國丁卯夏、偶檢舊籍、得先大父遺墨一紙、有友梅宗兄擬爲參校梓行之語、按友梅朱鏡蓉先生字也、卽爲先大父刊說文通訓定聲者、疑爲說文後識語、何以刊本無之、復核年月不符、遍檢遺著、見書經古注便讀、卷首題有古黟朱鏡蓉參校、知爲此書識語、後因兵亂、書卒未刊、遺稿今尙保存、正不知付梓何年耳、茲附錄識語於下、余積年來著書九十餘種、無力盡刊、置之篋衍、此書道光癸巳在濟南脫稿者、忽忽二十四稔矣、日暮途遠、人間何世、自等、敝帚之享、已無選梨之望、今得博雅好古之士、友梅宗兄、見許其可傳、爲之參校、毅然梓而

行之非其幸歟、余老矣、得一知己、可以不恨、所尤幸者、于流離顛沛之中、乃獲此賞心樂事也、咸豐六年二月、石隱朱駿聲識、又按余前編傳經室文集時、此稿未補入、

十四年、甲午、四十七歲、仍館山東、正月二十日申時、妾錢氏病故、聞耗、秋弟子謝增中式、（師轍按文集答太歲太陰問一篇此年所作）

十五年、乙未、四十八歲、會試、出邢福山房、未第、予前選旌德縣校官、因艱未赴任、服闋、未選到、又值王大臣爲肅清王等大挑、因歸應補班、仍挑教職、四月、出居庸關、至廷應州、候童春海刺史（恩）同遊八達嶺、摩崖題名共四人、予與浙江童恩、四明張忠恕、姚江張嗣鴻也、回京、五月出京、仍假館揚州謝增家、

十六年、丙申、四十九歲、會試、出周春麟房、仍不第、五月、出京、道揚州、六月抵里、八月選授安徽黟縣訓導、十月初十日、葬府君于長邑二都十三圖南中、因字圩陽山新阡、續葬妾錢氏於新阡、十一月、女瑞芝產歿、生外孫丙生、

十七年、丁酉、五十歲、正月、江陰令蕭（蔭恩）聘暨陽書院講席、林少穆先生推轂也、四月、往江陰、又至揚州、又往安徽廬江縣、候趙大令（亨衢）六月旋里、七月初二日、陳芝楣先生考驗、八月、繼室倪孺人來歸、十一月初二日、到黟縣、教官任、同寅丹陽東名澧、丁卯舉人、其子應椿、受業於余、

十八年、戊戌、五十一歲、正月、送府試、四月、送院試、

十九年、己亥、五十二歲、四月、送府試、六月、送省試十一月、送院試、

二十年、庚子、五十三歲、秋、納妾高氏、弟子丹陽東應椿中鄉榜第四名、

二十一年、辛丑、五十四歲、三月、送府試、閏三月、送院試、五月、外庶姑倪郭氏卒於署、

二十二年、壬寅、五十五歲、四月二十五日、巳時、雙壽生、八月、送府試、十月、送院試、（師轍按是年夏爲

朱晉康譟佩韋室跋語秋七月擬罪已求賢詔）

二十三年、癸卯、五十六歲、正月、庶母張氏卒於蘇城、是年初次俸滿、十月往府道藩撫各憲驗看、

二十四年、甲辰、五十七歲、正月、送府試、三月、送院試、十一月、邑建節孝總坊四千餘口、余於三年中、一手

經理、

二十五年、乙巳、五十八歲、送府試、六月、修造衙署、八月葺工、九月、送院試、是年、恭遇覃恩、賜封父母、

二十六年、丙午、五十九歲、正月、倪孺人送三妹回蘇、

二十七年、丁未、六十歲、二月、倪孺人自蘇回署、是月送府試、三月、送院試、夏、三妹許字同郡陸一鳴之子

鰲、六月、開雕自著說文通訓定聲一書、門生朱鏡蓉肩其事、（師轍按離騷補注序云道光丁未十

月養病居內日臥誦屈賦聞起讀王叔師注有不慨於心者忘其龕陋輒爲補訂如左云云知爲此

年所著

二十八年戊申六十一歲七月全書告成住太平府謁見羅學使(敦衍)並送書兩部十月送院試病足歲除始愈是年門生程朝鈺及其弟朝儀來受業(師轍按古今韻準序書成於是年仲夏)

二十九年己酉六十二歲二月初七日高氏生男殤閏四月印書二百部六月二次俸滿九月往府道藩撫憲驗看以勤職留任皖南道張鶴生同鄉委任安慶池州二府屬十二縣查辦事件十一月旋署

(師轍按儀禮經注一隅弁言知書成於此年)

三十年庚戌六十三歲正月十四日宣宗成皇帝龍馭上賓是月送府試四月送院試五月旋署恭遇皇上登極覃恩加一級是科會試弟子謝增進士及第一甲第三八月三妹故於蘇城倉米街九月女多寶生十二月十一日接到撫藩行文於九月三十日准部文戊寅舉人現任教職截取知縣到班八月二十四日奏旨咨取是年廣西金田村天主教匪洪秀全等謀逆起事

咸豐元年辛亥六十四歲正月送府試院試三月旋署六月晉府領文請咨八月旋署九月領咨入都十一月初抵京二十四日在禮部呈遞說文通訓定聲一書十二月十一日禮部代奏進呈御覽二十三日奉上諭「前據禮部奏江蘇舉人安徽黟縣訓導朱駿聲呈遞說文通訓定聲一書當交南書房翰林詳加閱看進呈朕幾餘披覽引證尙爲賅洽頗於小學有裨朱駿聲著賞加國子監博士銜以爲留

心經訓者勸欽此」遂不就截取、不赴春闈、領部照回任、是年八月初四日、逆匪陷廣西永安州、(師轍按是年爲朱謙山鐘譔羣玉山堂文集序)

二年、壬子、六十五歲、正月、自京起程回南、二月、抵安慶省城、三月、回署接印任事、是年二月十七日、逆匪自永安州竄擾廣西桂林省城、四月初一日、解圍、初四日、陷興安縣、旋陷全州、二十五日、陷湖南道州、六月初八日、陷江華縣、十三日、陷永明縣、二十七日、陷嘉禾縣、二十九日、陷桂陽州、七月初三日、陷郴州、又陷永興縣、安仁縣、攸縣、醴陵縣、二十八日、圍長沙省城、十一月初三日、自長沙竄陷岳州府、十一日、自臨湘縣至湖北、十二月、陷漢陽府、旋于初四日、陷武昌省城、

三年、癸丑、六十六歲、二月、始於黟北城外石村買房屋、將隱居於此、六月、奉府札委同全椒縣訓導潘申恩、勸諭捐輸、以資軍餉、是年正月十二日、逆匪至江西、九江失守、十六日、陷安徽東流縣、十七日、陷望江縣、同日、安慶省城亦失守、二月初十日、江蘇江甯府失守、四月初、滁州失守、二十一日、鳳陽府失守、(先師自訂年譜絕筆於此、後五年、係朝儀據桃源日記訂補)

四年、甲寅、六十七歲、正月二十三日、逆匪陷祁門縣、二月初一日、至黟縣、余與同寅周(槐)隨同地方官嬰城防堵、初四日、邑令田(荊)率鄉團擊退逆匪、五月、接部文自咸豐四年起、關帝升入中祀、舞用八脩、樂奏六成、與文廟同、

五年乙卯六十八歲、足疾作、養痾漳溪數月、七月初九日、康慈皇太后升遐、是年三次俸滿、十月、具履歷移縣轉詳府道藩撫各憲、(師轍按是年春有答貴池拔貢陳信吾論學書)

六年丙辰六十九歲、患肩風毒外症、二月、爲雙壽納聘一都程氏、三月、接本府告示、徽州府歙縣黟縣俱加文武學額各二名、五月、升江蘇揚州府教授、時同寅周清午先生歿於任、奉委兼理黟縣教諭、照照暫緩領憑赴揚、九月、外孫王叔沂入長洲縣學第九名、

七年丁巳七十歲、二月十七日、爲雙壽授室、四月、以疾劇告病、五月、上憲委休甯令瞿福田帶同醫生驗看、轉詳允准、移居石村、遂號石隱山人、旋入漳溪養痾、

八年戊午七十一歲、正月、延門生程朝鈺授壽兒舉業、爲更名孔陽、十月疾篤、自漳溪回石村、十六日戊午卯時、山人卒于黟縣石村、

先師嘉言懿行、不可殫述、謹以聞見所知、附識於後、以備誌傳之採擇焉、

師之入蘇撫幕也、裁答箋簡、日以百計、暇則從中丞上下其議論、暢陳吳中因革利弊、民風吏治、悉中竅要、與凡山川之夷險、文獻之盛衰、娓娓而談、瞭如指掌、中丞深加歎服、告幕中友曰、朱君品醇學富、殆非幕道中人、旣中丞調任安徽、訂師同往、師以親老辭、

師愛重人才、所至必加物色、初抵黟、知廩生汪君南士(文臺)好古士也、卽折節與交、晨夕相質難、經

史答問一書、因之面作、南士沒、貧無以殮、師弔諸其室、贈俾成喪、宿艸已深、猶時時致惜、謂學人難得云、

周清午先生蒞教未久、卽際時艱、子婦相繼歿、冷囊久罄、師極力周卹、每值流離顛沛、必挾與俱、丙辰夏、竟卒于任、師首賻三十金、并爲致書邑紳彙飲百金、付其甥黃得寓葬黟城之西、封識如禮、

師之初來吾黟也、與家君傾蓋如故、師齒方倍于家君、卽訂忘年交、故儀少長署中、視師猶父、師嘗稱家君爲古道君子、不當于今人中求之、迨師晚年暨身後事、家君皆一力維持、蓋不敢以死生之故、稍負吾師、而師早于訂交時知之、

師以截取入都也、因進呈自著書、蒙賞加國子監博士銜、將治歸、門人謝夢漁侍御新及第、請師試春闈、師笑曰、自宦隱桃源、久不蹈春明路矣、今幸黃扉留跡、此去便當歸田耳、旣都中故舊留之者衆、師乃留刺辭謝、輕車出都門、

師少寡兄弟、旣宦黟、值春秋祭祀、念先人邱墓、則愴然涕下、卸任後、寓書于從姪少英、欲效范文正故事、置立義莊、爲商略規條、將以歸田日行之、

師嘗自製聯云、「禮以制心、于古聖昔賢行事無所媿、學惟爲己、非三代兩漢之書不敢觀、」又云、「合漢唐宋而成學、通天地人之謂儒、」又嘗夢中自書屏風一聯云、「孝弟忠信師乎民、是亦爲政、」

學業文章斬于古、聊以自娛。」

先師朱允倩夫子、自著年譜一卷、隨年劄記、置之篋衍、未以示人、易簣始獲見之、其甲寅以後闕如、當由躬際時艱、有所不忍紀也、吾師少壯好學、老而彌篤、所著書多至九十餘種、壬子春、自都中歸、猶訖訖手自撮鈔、雖甚寒暑不輟卷、儀嘗從容以葆精齋神請、師顧謂樂此忘疲、然意似小納、自是日事搜討、夜則究心老莊、率以爲常、嘗曰、八十一章道德之言、三十三篇逍遙之旨、余晚年所寄目力者此耳、儀見師神明矍鑠、不減小年、私自竊幸、以爲期頤可卜、詎甲寅乙卯以來、疊逢顛沛、致抱沈疴、其撮鈔要未會少間也、蓋師莫年、儀侍几杖之日多、師極垂青睞、旬日不至、則走僮相招、丁巳秋、師入漳溪、儀亦避地鄉間、音問稍疎、今年九月、問疹漳溪、見師于牀褥間、猶諄諄以勤學好問爲儀勗、然輾轉呻吟、意似甚苦、心竊憂之、而未敢發也、已而儀有武林之役、比歸、則聞師于十月間遽赴道山、悲從中來、淚如雨下、踰跟趨殯所、竭情慟哭、哭已、唁仲我世兄于苦次、仲我泣授此卷、及師生平桃源日記、屬爲訂成、儀惟師續學植行、無媿古人、異時文苑儒林、將榮國史、典型具在、敢使無徵、謹受而訂之、繕寫旣成、仍付仲我、俾得請于大人先生、錫之誌銘、誄傳、光賁泉壤、匪惟生者感且不朽、卽吾師亦啣感於九京也、已、受業黟程朝儀謹識、先大父自訂年譜、絕筆於咸豐三年、後五年事、門人程朝儀所補、先大父晚遭亂離、感愴世變、憂

深家國、體氣驟衰、遽賸風痺、不復秉筆、退隱黟北石村、自號石隱山人、雖習鑿病廢、猶時時著書、輒口授。家君及弟子程朝銓、朝儀等錄之、生平著述、都九十餘種、然自載于年譜者、僅六十四卦經解（八卷、即古易會通）及說文通訓定聲二種、尙有春秋平議三卷、春秋三家異文覈一卷、春秋亂賊考一卷、春秋左傳識小錄二卷、春秋經傳旁通目十卷、春秋列女表一卷、春秋闕文考一卷、春秋地名職官人名考略三卷、春秋國名今釋表一卷、學易札記四卷、易鄭氏爻辰廣義二卷、易經傳互卦厄言一卷、易章句異同一卷、易消息升降圖二卷、尙書學四卷（即尙書經古注便讀）、逸周書集訓校釋增校一卷（即逸周書簡端記）、詩集傳改錯四卷（即詩傳箋補）、詩序異同彙參一卷、詩地理今釋四卷、儀禮經注一隅二卷、三代禮損益考一卷、井田貢稅法一卷、大戴禮校正二卷（即大戴禮簡端記）、夏小正補傳一卷、四書塙解二卷、四子書簡端記四卷（即懸解）、論語紀年一卷、孟子紀年一卷（二書疑即孔孟紀年）、傳經表一卷、小爾雅約注一卷、離騷補注一卷、七經緯韻一卷、古今韻準一卷、說雅一卷、說文通訓定聲補遺二卷、說解商十卷、小學識餘四卷、經韻樓說文注商一卷、說文引書分錄一卷、六書段借經徵四卷、古說字形繆誤二卷、小字本說文簡端記二卷、釋廟一卷、釋車一卷、釋帛一卷、釋色一卷、釋詞一卷、釋農具一卷、經史答問二十六卷、十六國考二卷、秦漢郡國考四卷、晉代謝氏世系考一卷、名人占籍今釋四卷、徐中山王譜系一卷、朱氏

世系考二卷、歲星表一卷、天算瑣記四卷、數度衍約四卷、山名今釋一卷、各府縣人物志二十卷、淮南子簡端記六卷（卽淮南書校正）、老子簡端記、列子簡端記、莊子簡端記、管子簡端記、晏子春秋簡端記、讀韓非子札記、呂覽簡端記、新序簡端記、說苑簡端記、鹽鐵論簡端記、風俗通義簡端記、荀悅申鑒簡端記、論衡簡端記、劉晝新論簡端記、各若干卷、說叢六卷、軒歧至理四卷、漢書雋語四卷、儷語拾錦四卷、李杜韓蘇七言詩評選六卷、蘇詩分韻不分卷、如話詩錄一卷（卽白描詩錄）選詞九十調譜二卷、詞話二卷、傳經室文集六卷（師轍補輯十卷賦一卷）詩集四卷、臨嘯閣詩餘四卷、賦一卷、庚午女史百詠一卷、帖體詩二卷、時文二卷、均未記于年譜、蓋先大父重實踐、雅不欲以著述宏豐自炫、故成書而未勘定、勘定而未鈔錄者、皆弗記載、足徵先賢律身修學之嚴矣、師轍爲便後學備考證、謹注所著諸編成書年月可考者於譜內、其不可考者、仍付闕如云、民國七年八月孫師轍謹識、

吳中文獻小叢書

- | | | | | | | | | | |
|----------|---------|--------|---------|------------|--------|--------|--------|----------------|--------|
| 第十種 | 第九種 | 第八種 | 第七種 | 第六種 | 第五種 | 第四種 | 第三種 | 第二種 | 第一種 |
| 石隱山人自訂年譜 | 十藥神書 | 吳音奇字 | 珊瑚舌雕談摘鈔 | 明周端孝先生血疏題跋 | 七姬詠林 | 王巢松年譜 | 聞見闡幽錄 | 吳下尋山記
王雅宜年譜 | 張篁邨詩 |
| 二十八年十二月 | 二十八年十一月 | 二十八年十月 | 二十八年九月 | 二十八年九月 | 二十八年八月 | 二十八年七月 | 二十八年六月 | 二十八年五月 | 二十八年五月 |

127/502

上海图书馆藏书



A541 212 0002 5473B

民國二十八年十二月

江蘇省立蘇州圖書館校印

石隱山人自訂年譜 非賣品

總

.97
74